

Fienide rairuiyanona uurite

Así habla para regañar al mal

Blas Candre (BC)

Adofiki (Cordillera), río Igaraparaná, septiembre 1, 1992

Uafue mei yotio, moo. BC

Mei batinomo mei tainona mei ite, BC
fia kai ua afe izoikano mei ite
komekido iñenado, kaido fieni mei
ua kakaide.

Mei kai bie ua jiaienamakidikai afe BC
izoidinona finoñedikai.

Jae jaka mei ua daii bite kai uzutiai. BC

Ie mei kaimo mei ite naino iadedi, BC
afe izoikana ua ba ebena ua
naaganuaido afe uaido mei
zefuiñedikai.

Ie jira afeno mei kaimo ba daii ua BC
dukiino kai ua iyano abiedo jaaide ua
kaimo ua bite izoi ua kai mameka.

Nino ua aruire kaido jaaide ua, jiaifo BC
kaido jaaide, fia mei ja biemo mei
yoga.

Ie mei baie mei ja nino mei yotio, BC
mei urue daii zefuiyeita urue mei afe
izoi zefuiñede.

Einamaki ua komeki ifuena ite. BC

Ie mei fienide daii makade, daii BC

oretaga, ie ba ua fibiñede ebena ua ja
ua zida yote, ikirafue tainede,
faidode, ja ba uriyafue ja mei
komuide.

Ie jiai bie mei jabe daani kai iyano, ie
jira kai iyano komeki meiñotikai,
afeno eroidikai, iñede mei.

BC

Iñede, ¿nibai mei ua benodo ua ba
naaga mona, naaga naio zuaire
uurite?

BC

Mei iadi mei ja nino yotio, ikirafue
naama dino jaikina mei uuritenia
figora, ba ie okainaia okaina mamedo
jaaide.

BC

Ie mei bie enie aiyora mei, onido
makade, buu nii ei daiiñena, jaikina
jaaide jiai, mei makadenia jiai
makade.

BC

Ie mei ua ba oni ba jiaizamo
jikanokano uite, oni ba jiaizamo
kakatakana uite, daii rafue iñede.

BC

Mei kaiita ñeiri, mei kaitubimo
meiñotikai mei iñede.

BC

Ie jira ¿nino mei yoite mei beno
uriye?, daidikai

BC

Ie jira nii beno ua kai uriya komeki,
ua o eikomedio ua eroidio, raidio,
kaadio.

BC

Niie mei bie yeraberona mei iya, niie
jiibizomana iya; ie afenori fienide
uaina iñede, ba izoidena iñede,
ikirafuena iñede, zuufuena iñede,
ebena iñede.

BC

Ie jira bie izoide mei kai yotikai mei
be uuritikai, kaadikai; iena ¿nibai ua
be ba jiaimaki janaide, jufidote?, ua
¿nino jenodimaki, nino rakadimaki?,
ua ¿niie izoidinodo imaki komeki
jaaide?, daiinide, iñede.

BC

Bie ua uafari be ite, Moo kiode, Moo onode, be daii kai iyanodo. BC

Mei afemiemo ua kai jitaiya jira, kai jikaka jira afe izoikana kai joonega, nne yeraberona iya, nne jibizomana iya, ie nimanota, ie norainota mei kai bie uuritikai. BC

Ie be nii ua komeñede ia be ua riama iaiyinoi ua ja iaiyinoimo itabiye izoikana mei bie izoi ja ba mananaita iaizaimo daidiaiyino, jibikongomo daidiaiyino, riama iadedi mei. BC

Ja iaiyinoimo itabite bie diona uai ua ba inotaiyino, ua komeñede iadi ua fimaide izoi mei bite, fimaide izoi kai ua nabaide. BC

Ie jira afenori mei daajemo dane ua fo yinota ja mei birinoga norainoga afeiyinoi ua kai kanode bibenedo. BC

Ie mei bie daaje jiañede. BC

Ie mei daaje taijie eroikana iaiyinoi finoka, daaje komeki ua meinyena, daaje ua uai ua nabaiyena. BC

Nii uafuena bifokoni itino. BC

Ie jira mei aferi bie ua ja mei uuritikai, aki daii ite kai ua komeki ifue, kai ua rafuena ite, kai taijiena ite, daidikai mei ja ifueritikai, norainota, nimanota mei aki daii kaimare ja uurite. BC

Iemona mei jiaitubina inede. BC

Ja ie kai ua jiai uinoga uaina inede, kai uinoga rafuena inede, ninena mei ua bite kai koni uriye. BC

Ie mei baie mei izoikana itino mei baifene mei kome jibie duteita yera meteita fia ua taino uaina ite. BC

Ie mei bie izoikana ite mei ja kai nimanoga ja kai norainoga uafue mei BC

daidikai.

Ie jira benomona bie izoikana kai ua mairiena ite, mei meidotikai.

BC

Kai ua taijie ua bai fiiua ua uiyena, finokana uiyena, joonekana uiyena, yokana uiyena, mei nii afe kai ua birui yotikai.

BC

Ie jira nii bie ua ja mei ua be ua jae batinomo ba daii ite.

BC

Ie afenomo ua feeko kioide, ua taifuena ite.

BC

Ie mei birui ja mei jooide, ja yeraberona ite, ja ua jii bizomana jooide, ie nimanota, ñorainota mei ja kai ua dane mairieki bite, uai bite, ja kai komeki uibidikai, ja nii mei ua daani kaiena itino.

BC

Ie yezika mei baie buuna nafueñega, ie yezika baie ua izoide buuna kakareiñega, ie jira mei yoga.

BC

Bie izoi kai itikai, omoi uriakania mei onidomo uria, onidomo makaa, ja mei daina.

BC

Ie izoide ba buu ua fia jiyakimona jiaima ua rafue yote ua gagukana uiñede, jiaima taijie ua komeki judaikana uiñede, jiaima ua komeki ua faidokana uiñede.

BC

Koni jae ua aki daii ua ba einamaki yotimaki.

BC

Ie nieze iyanomona mei bie izoikana ua kai itikai kai daina mei uafori mei ite, ua tainona iñede.

BC

Ie jira mei menakaño ja ba ua bitenia mei ua jaikina jaaide.

BC

Nia ja ua afenori mei ja uriyafuena ja ikoï ua fia onido uuritiomoi kai iko mamedo bitiomoinia, ja mei kome ana raiinano uurite.

BC

Ie baifene ja oni ʔo minikana jaaide?	BC
Ie jira afe izoikana iñeyenia mei yoga.	BC
Mei kai bie izoikana kai iya komeki daa oni ba kai uruiaimo ite, ringozamo eroide, jitokomemo eroide, nabaimo eroide, mei bie uai aki daii bite.	BC
Ie jira afemaki raruiyano mei aki daii daidikai.	BC
Ie jira bie fia daa taijie ua yotikai aferi komeki jooneñedikaiza ua daaje kai iya izoi ite ua komeki mei yotikai.	BC
Ie jira afenori mei bie diona uai jiiibina uai mei nieze ua oni ba daani bie omoi uibikafue bie daani omoi ogano, ua jiaiza kaina daiiyena iñede.	BC
Mei nana nairai ua daaje diona finode, daaje jiiibina finode, iadedi mei ba imaki biyagobe biya izoi mei afemaki bite, kai bie jiai kai oiakania izoi itikai.	BC
Ie afena beno ua ba ite namaki kaina onode, kai jiai afemakina onodikai, jiaimakina onodikai, jiai eikome komekimo jae ua ba uzuma ua kakade, imaki diga nabairite iñede, mei ʔninomona birui uurite?	BC
Aki daii ite kuemona.	BC